



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
12 Feveiru 2014

Tribunál Distritál Suai kondena autór kazu violénsia doméstika hasoru labarik

Iha 11 Feveiru 2014, Tribunál Distritál Suai kondena arguidu PB ne'ebé prátika krime violénsia doméstika hasoru nia oan mane ho pena prizaun fulan 4 no suspende ba tinan 1. Kazu ida ne'e rejista ho Númeru Prosesu: 220/pen/2013/TDS.

Ministériu Públiku akuza katak iha 04 Juñu 2013, arguidu lori aisanak baku dala rua iha tilun no baku dala ida iha kotuk laran hasoru vítima. Kazu ne'e akontese tanba vítima foti nia avo nia osan \$ 10 ne'ebé mak lakon.

Relasiona ho kazu ne'e, Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples kónjuga ho artigu 35 Lei Kontra Violénsia Doméstika.

*“Violensia hasoru labarik iha kualker forma no situasaun nu'udar krime ne'ebé sériu teb-tebes tanba aleinde bele rezulta kanek fízika ba labarik sira, aktu ne'e mós afeita ba labarik sira nia dezemvolvmentu psikolojiku. JSMP preokupa ho forma disiplina ne'ebé inan-aman sira uja hodi eduka sira nia oan tanba aprosimasaun hanesan ne'e prejudika teb-tebes labarik sira nia interese no direitu atu livre husi kualker forma violénsia hasoru sira,”*dehan Diretór Ezekutivu JSMP Luis de Oliveira Sampaio.

JSMP hein katak ho prosesu no kondenasau ne'e bele espalla mensajem ba sosiedade tomak katak violénsia hasoru labarik nu'uda krime no inan-aman hotu-hotu tenke maneja-an aprosimasun la ho violénsia atu eduka sira nia oan. Iha audiénsia julgamentu arguidu konfesa faktus hotu no hatudu nia arependementu no deklara katak sira dame malu ona liu husi kustume konfirma mós husi vítima.

Bazeia ba faktu no sirkunstansia atenuantes hirak ne'e, tribunál konklui hodi fó pena suspensaun ba arguidu no husu atu arguidu la repete tan ninia hahalok iha futuru.

Prosesu julgamentu deriji husi Dr.Alvaro Maria Freitas, Ministériu Públiku representa husi Dra. Benvinda Rosario da Costa no arguidu hetan akompañamentu husi Dr. Manuel Amaral (estajiadu) husi Defensoria Públiku.

Atu hetan informasaun kle'an liután favór kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone: 3323883 | 77295795

Website: www.jsmp.tl